

1. Uvod

Cilj ovog diplomskog rada je da temeljito upoznam rad Sarajevske berze i način funkcionisanja tržišta kapitala u Bosni i Hercegovini i takođe da upoznam što šire ulogu i značaj berze i berzanskog poslovanja.

Izbor i obrada diplomskog rada je podsticajni faktor za mene studenta koji se prvi put susreće sa tematikom berzanskog poslovanja kao naučnom disciplinom, imajući pred sobom vrlo interesantnu i specifičnu naučnu disciplinu. Bilo mi je potrebno dosta vremena i rada kod analiziranja podataka i načina poslovanja, zatim provjeravanja pojedinih navoda i podataka korištenih iz raznih izvora dostupne literature. Ovu temu sam izabrao sa posebnim interesom jer je ovo vrlo kompleksna materija sa kojom se svakodnevno susrećem u ekonomsko komunikacijskim kontaktima, u poslovnom svijetu. Ovo je tema koja se na prvi pogled čini dosta jednostavna ali ustvari je specifična, složena i vrlo interesantna. Kvalitetno upravljanje finansijskim sredstvima (novčanim sredstvima i efektivom) zahtjeva visoka stručna znanja i profesionalni rad. Kao preduzetnici i menadžeri i kao vlasnici nekih slobodnih novčanih sredstava, moramo posjedovati određena znanja, vještine i umijeća vezana za tržište hartija od vrijednosti, kako bismo mogli kvalitetno komunicirati sa finansijskim stručnjacima. Berze su izuzetno značajno mjesto trgovanja hartijama od vrijednosti.

Moderno doba nam nameće ubrzani ritam kretanja i ubrzano poslovanje što je i karakteristično za poslovanje na berzama gdje dolazi do izražaja sposobnost, vještina, znanje i umijeće učesnika na berzi.

Upravo je cilj ovog diplomskog rada ukazati na veliki značaj berze u dinamici današnjih tržišnih prilika i zbog niza prednosti koje one obezbjeđuju u savremenoj tržišnoj privredi. U svjetskim razmjerama najpoznatije su berze u New Yorku, Londonu, Frankfurtu i Tokiju.